

pci

May
2018

Presbyterian Church in India (Reformed)

MESSENGER



William Pettigrew



Watkin Roberts



Manipur leh ei singtangbiai a ding a
missionary poimohte



Editor
Rev. & Dr. Khen P. Tombing

pci Messenger

A monthly organ of Presbyterian Church in India (R)

Vol. XXVII

May 2018

No. 04

PRODUCTION TEAM

Editor

Rev. Dr. Khen P. Tombing
C/No. 9862088190

Jt. Editor

Rev. H. Chin Thiansong
C/No. 8731850322

Contributing Editors

Rev. Khamlianmang
Rev. T. Liankholal
Eld. T. Khupzadou
Eld. Langkhanpau Guite

Cir. manager

Mr. C. Biaklun

THU TUUNTE

<i>Kitheihchianna nuam</i>	<i>01</i>
<i>Christian Biakna</i>	<i>02</i>
<i>Kha Siangthou & Missions</i>	<i>11</i>
<i>NE India mite...</i>	<i>15</i>
<i>PCI (R) dinkhiak dan</i>	<i>18</i>
<i>Late thu</i>	<i>23</i>
<i>MCH</i>	<i>24</i>
<i>Brief synopsis of Delhi PC</i>	<i>29</i>
<i>PYFJC kidemna</i>	<i>32</i>

Head Office

Presbyterian Church
in India (Reformed)
Box -32, Hebron Veng,
New Lamka 795006
Manipur, INDIA

Subscription Fee

Rs. 10/- per copy or per month

Website of the Church

<http://www.pcireformed.com>

A sung a thu
kisiahte editorial board
ngaihndan ahivek
kei.

*Printed, published and edited by Rev. Khen P. Tombing at Diamond Offset
Press for the Presbyterian Church in India (Reformed)*



KITHEIHCHIANNA NUAM

-Rev. H. Chin Thiansong

Pathian in hon it ahi chih ithei ua, hiai khovel ban ah Van gam tan a leng hon it tawntung ding ahi chih iteih ziaq un kipaktak leh khamuangtak in iom thei uhi. Pathian in hon it ahi chih bangchibang in itheithe i ua ichihleh: ATapa tang neihsun eite sihsik a sidinga apiakkiak ngamna ah hon it taktak ahi chih itheichian uhi "Banghanghiam chih leh, Pathianin khovel a it mahmah a, huchiin a Tapa tang neihsun apia hi... Johan 3:16. Hiaiah itna a om, eiten Pathian i it uh ka chi a hi kei, amahin a honit a, i khelhnate thuphatawina hi dingin a Tapa a honsawl ka chi a hi jaw" IJohan 4:10. Huan Jesu Krist in ahinna pia a eite sihsik a asih ziaqin hon it taktak ahi chih itheichian ngam uhi "Huan, Jesun, Pa, amau ngaidam in; a thil hih uh a thei kei ua a hi, a chi a.... Luka 23:34. Huan, Jesu aw ngaihtakin a kikou a, Pa, na khutah ka kha ka honkem sak hi a chi a. Huan huai a chih khitin a kha a khahta...Luka 23:46".

Ahieh!Nang, Pathian na it taktak hia? Jesu Krist na it taktak hia? it taktak nahi chih aman (Pathian in) bangchi in athei dia? Hiai dotna poimohtak eimah leh eimah mimal chiat kidong leng ichi hi.

Huan, Abraham in Pathian thu aman ziaka apaina lam ding leng thei loupi a apaikhiakna ah Pathian it taktak ahi chih iteihpih ngam uhi "Ginna in Abraham tuh sapa a om laiin... a paina lam ding leng thei louin a pai kheta a..." Hebrute 11:8. Huan Abraham in Pathian azuihna ah amah vuakmai a zui lou in, aneih alam teng toh azuih ziaqin Pathian it taktak ahi chih iteihpih uhi "Huan, Abramin a ji Sarai leh, a naupa tapa Lota leh, a sum kaihkhawm tengteng uh leh, Haran khua a a mi neihte tengteng uh a pi a...Genesis 12:5.

Ahילהle NANG Pathian it taktak nahi chih midang te' n bang tungtawn in a hon theihpih ding ua? Pathian in hon it ahi chih itheihchet ngamna tuh athil piak ah ahi. Nang Pathian it taktak nahi chih Pathian in hon theihna din bang na pia a?

Itna tellou in thilpiak ipethei kei ua, thilpiak pelou in eite' n i it thei kei uh. Ivuak mai a Pathian zui hilou a, Abraham banga ineih ilam toh Pathian zui thei ding in Akha Siangthou in hon makaih chiatta hen. Amen.

Christian BIAKNA

– Rev. M. Khamlianmang

Johan 4:24

“Pathian jaw Kha ahi; a bemiten kha leh thutaka a biak ngeingei ding uh ahi, a chi a”.

Biakna tuh Khristiante adia nasepna sangpen, Pathian thupina ding saptuamte nasep, saptuam dinsan leh kingakna bulbi pen ahi. Laisangthou a thupoimoh itna, hehpihna leh ginna chihte mahbanga suitham ching thumal tuh “Biakna” ahi. Biakna itheihciam taktak nading in hinkhua a neia izat chiangin in itheisiam pan ding. Huai tuh khuaizu khumdan agensiam thu hilou a ichep chianga akhum dan iteih toh kibang ahi. Biakna thumal tuh Greek pau in ‘proskueo’ khupboh hiam khundin chihna ahia, a gen ut tuh kingainiam leh zahtakna toh kituklutna. Zahtakna leh tupina Pathian kiang a pia chihna ahi. (Nas. 24:11; I Kor. 14:24-25).

Biakna Hilhchetna khenkhat:

1. Pathian deihsakna ziaik a lungsim kipahna luanglet genna: Biakna tuh Pathian hoihna, thupina theia lungtang kipahna genna ahi. Kumpi David in, Pathian pahtawina pia in, a phatna late sa in Amah ibeding uh achi. Aziak tuh Pathian thupina, thilhihtheihna leh deihsakna tang ahi chih Laisiangthou leh thilsiamte apan a theihtheih ziaikin.

2. Biakna tuh Pathian kia toh khalam kithuahkhawmna ahi: David lungsim kipahna a hong dim in, Toupa ma ah a tu a, alungsima a kipahna ziaikin Pathian abia a, "Pathian aw... nang zaw na thupi a, ka bil ua ka zaksang un nang bang mahmah a omkei; nangmah loungal Pathian dang himhim a om kei" II Samuel 7: 18-22 ah achi hi. Huaiziak in biakna tuh Pathian kia toh lungtang kipawlna ahi chih ahi.

3. Biakna tuh lungsim a, Pathian honpepa(giver) Tapa, Hondampa (Saviour) leh Khasiangthou (Holy Spirit) ompih leh sungten theihchetna ziaika biakna ahi chih ahinawn.

4. Biakna tuh khalam a Pathian kiang a kipiakkhiakna ahi.

5. PCI(R) Constitutions 'Pathian Biakna Pitu Bung 47: 2na Biakna a gingtute kithuahkhawmna toh kisai hichin akigen hi. "Mipi biakna kikhop tuh Pathian' tate amau leh amau kimuhtuahna kia lel hilouin, apoimoh pen in Pathian leh A tel mite kimuhtuahna ahizaw. Huan, hiai kithuahkhawmna tuh gingtute laka khalam leh taksalam a kithuahna leh ki itna kingaihnatna leh kideihsakna sulkatna ahi ding hi" chi hi. Huaiziakin biakna tuh Pathian toh kithuahkhawmna ahiziaikin abemi ten Pathian a houpihna leh biak a om Pathian in amite ahoupihna ahigige ding ahi.

Laisiangthou apan biakna sung a kihel teitei ding imuh theihthe tuh : Lasakna (Ephes. 5: 19; Kol. 3: 16), Laisiangthu simna (I Tim. 4: 13), ginna puankhiakna (I tim. 1: 15), Pathian thugenna leh sinsakna (Neh. 8: 2-8; Luke 4: 16 021, 44), Thilpiak latna (Nas. 2: 42; Phil. 4: 6), Sacrament te: Baptisma leh Toupa Ankuang Siangthou (Matt. 28: 20; Nas. 2: 24) leh thumna chihte atel ngeingei ding ahi.

Biakna ah kua biak ding ahia?: Pathian Jehovah kia biaktak ahi. Amah sang a thupizaw omlou ahihmanin. Pa Pathian, Tapa Pathian leh Khasiangthou Pathian kia biakding ahi. Pathian kia biakding ahihna ziate:

1. Hinna pepa, thil tengteng kipatna leh bangkim bawltu ahih ziaikin (Sam 36: 9; 68: 69; Nas. 17: 28; Johan 1: 17; Kil. 4: 11).
2. Lametna hing hon bawlsaktu, A tapa honpia, mial apan hontan, vankhua leh tui leh siampu lalgam a honbawltu ahih ziaikin biak ding ahi (II Kor. 9: 15; Kol. 1: 12, 13; Kil. 5: 9-14).
3. Pathian siangthou, diktatlouhna hua, Pathian thupi, zahngaithei, ahoihloute hua ahihziaikin (Sam 103; Joh. 17: 16; II Kor. 1:3 ; Ephe. 1: 13).
4. Eite hon it a, hon teeltak ziaikin, hon vualzawl, Amah bia theidia hon bawl ziaikin (Joh. 3: 16; 4: 23-24 Ephes. 1: 3-4).
5. A hon thilpiaksate tengteng (ahihhna tel in) leh a hon sepsaklai dingte ziaikin.

Laisiangthou a biakna: Biakna Thukhunlui hun laipek in na omta hi. Eden huan a Pathian toh Adam

leh Evi te nuam takin ana kithuahkhawm ua, huchi a Pathian apan hawlkhiaik ahih zoh uh Genesis 4:3 ah Kaina leh Abel in thilpiaka Pathian abiak dan uh imu thei hi. Ahia, thukhunlui hunlaia biakna tuh kithoihna leh kipumpiakna biakna ahia, mimal leh inkuan biakna thumna, phatna, kipahtugenna leh laisiangthou simnate ahitangpi hi. Thukhunlui huna biakna muhtheih dan nga(5) khong in akikhen thei: **Khatna**-Suangtubul (Patriarch) te hun a biakna. **Nihna**-Mosi huna biakna, **Thumna**-Kumpite hun a biakna, **Liina**-Saltanna huna biakna, **Ngana**-Saltangte kiknawn nunga biakna ahi. Hiai hun tana biakna ah Judate thuginpi simkhiakna, akidawng a thusim, Dan thu leh Zawlneite laibu simkhiakna, Laisiangthou hilhchetna, Siampu thumsakna leh Tawpna chihte ahi.

Thukhunthak biakna leh dante tuh Thukhunlui huna abiakna leh dante apan hong om ahi. Thukhunthak biakdan tuh Sinagok (Synagogue) biakdan toh kibang sim mahmah hi. A ziaik tuh nidanglai biakdan tampi kilasawn ahihmanin hiai bangte biakna ah a om: Laisiangthou simna, thugenna,

phatna lasak, thumkhawmna, Toupa ankuang siangthou, Baptisma chihthe ahi.

Thukhunlui a biakkhawmna taktak hongkipatna Tabernacle bawlzoh apat achi chih thieh hi. Pathian in biakbuk lam dingthu Mosi tungtawnin Exod. 25: 9-40; 26: 30; 27: 8; Heb. 8: 5 te ah ana agen hi. Toupa Pathian chih bangin Mosi in biakbuk abawl a tua ah Toupa toh kithuahna Israelte'n biakna anei zel ua, Toupa thupina in alak uh ahidim zel.

Thukhunthak ah Aron siampu hihna dan leh biakna dan khenkhat thukhunthak ah, Jesu Khrist sihna ziakin a beita hi. Niteng hiam, kum teng hiam a ading hinawnlou in Khrist in khatvei adia kithoihna in khelhna ngaihdamna Pathian toh kilemna abawl a, siamtangin tangtawn hinna ingah thei hi. Jesu Khrist tuh siampulian pen ahi a, amah gingtaten hangsantakin Pathian zahngaihna mangtutphah naih theihna ineita uhi.

Thukhun Lui hun ah Jawlnei ten biakna diktak khalam biakna huaiin mihing hinkhua kheng lamdang thei ahih dan a auanggan ua, Sawltak Paulin Romete kiang

ah kithoihna hing leh siangthou Pathian pomtak huai tuh khalam biakna thu agen hi.

Biakna peuhmah asingthou Pathian pomtak hiveklou hi. Polam kilawmna kia zonga biakna tuh Pathian pomtak biakna hilou hi. Thukhunlui leh Thukhunthak hun abiakna a Pathian deih pen tuh lungsim tak a kiphalna ahia, a thilpiak pen ahizaw kei, lungsim taka kiphalna leh kipiakkhiakna, huai tuh khalam biakna ahizaw hi. Pathian tuh kha ahia, abia miten kha leh thutak a biak ding ahi (Johan 4: 24). Huaiziakin biakna tuh asingthou khalam biakna ahi ding hi.

Thukhunthak hun a biaknadan tuamtuanamte:

1. Biakna kikhopna hun ah michih Pathian hatkhum leh thuhing tang dingin kihong takin om uhi. Pathian thuhing tuh biakna kikhopna huna tel mi tengteng ading atup thupi ahi (Nas. 20: 32; II Tim. 3: 16, 17).
2. Khrist Toupa a sangte lakah kikhop khawmna a om a, Khrist abulpi a pangin Amah min in kikhawmkhawm sek uhi (I Kor. 1: 2).
3. Jesu Khrist alutangpen, abulpi himahleh khochih saptuamin

biakna nei zel uhi (Ephes. 1: 22-23; Kil. 1: 12, 13, 20).

4. Biakna sung ah gintu mimal chihte leng Pathian mai a siampuhihna neia seh ahi ua, Pathian kiang ah thumna thillatte lan thei in, numei leh pasal Toupa mai ah kikum a seh in om hi (IPet. 2:9).

5. Saptuam local chihin amaua kipua in thuneih na tuam nei in biakna leng anei zel uhi.

6. Gintu masate pawl (denominatin) tuamtuam a kikhenlou in, gingu hng hithak ten amau lemtang hun leh munpenpen ah biakna zom uhi (Nas. 15: 1-29; I Kor. 1: 10-15; 3: 1-10).

7. Thukhunthak saptuamte tulai bangin gintu leh gingu lou ana om kei ua, Biakna a kikhawmkhawm te peuhmah gingu te kia ana hi uhi. Huaizak mah in Laikhak te leng gingu te laka khak ana hazel (romete 1: 7; I Kor. 1: 2; II KOR. 1: 1; Ephes. 1: 1; Phil 1: 1 leh adangadang).

Biakna paidan leh biakna a telding thilte Laisiangthou a kichiantak a ana kigen himahleh mitamtak ten utteng leh hoisak teng kitelsak in anopna ding leh kilawmna ding kizong a fuh leh fel in kilawm mahmah a, biakna leng nuam

mahmah thei hi. Himahleh biakna gahsuah taktak vang hiin amuh theih hi. Huaizaikin biakna dik leh gahsuah kipoimoh mahmah hi. Huaiding in biakna paidan tuamtuam omte lak ah ei "Reformed" saptuamte zuih tangpi zuihtheih ding ngimna in itaklang ding.

Hiai anuai abang in Reformed saptuam te lak a biakna paidan zui in kikhopkhawmna kinei tangpi hi.

Biakna Paidan kizui tangpi te (Order of Worship):

1. Vaidawwna: Hiai pen Pathian biading a sapna hinailou ahi. Biakna pitu in mipi Pathian biading a hongpaikhawmte vaidawwna anei ding, abik in mithak, melthak om leh amin uh lou hiam, dingsak hiam a vaidawwna neih thil kilawm ahi. Huchibang a hiading in ahiththeih liaileh amaute vahoupih masak tuh biakna pitu ading in a pilvan huai mahmah ding. Gingu mi zumpipi a hong kikhom bang hikha taleh a lunglutna mangsak thei mawk ding hi. Meltheihsa leh mundang khong a member anahia, hongzin hong kikhom khong ahileh bel dinsak sese thil kilawm ahi. Atangpi in 'tuni a hiai local

church a member hikhalou hong kikhawmte tengteng vaidawwna special in kon bawl uh' chih zel thil hoih ahi.

2. Thupuanna: Thupuan tuh biakna item lak a atel teitei apoimoh luatna a om kei, Notice board a taak theih ahia, asim theilou leh a theikhalou hiamte ading khualna leh venna leh genchet ngai zek omte biakin a biakna huna puan ding chihthu ahi. Huchibang thugen zoh khunkhak ma in leng ahi thei ichi ding. Himahleh hunpatma tuh ahoih pen leh biakna subuai khalou ahih manin ahoih pen hi

3. Chibaibukna : Hiai pen mun khenkhat ah, khat leh khat ikiang a tute toh chibai kibuktuahna dan in izang ua, huai ding hizawlou in Pathian minlou a vualzawlina kipiak tuahna, Pastor leh saptuam mipi kidawwna ahi. Etsakna ding in :-

i. Pastor(Biakna pitu) : Toupa na kiang uah om hen (Toupa noute sung ah teng/om hen)

Saptuam mipi : Nang kiang ah leng om hen(Nang sung ah leng teng/om hen).

ii. Pastor(Biakna pitu) : Toupa kiang ah kipahthu I gen ding uh.

Saptuam mipi : Hiai tuh a kiawm in, hih ding him ahi.

iii. Pastor : Pa, Tapa leh Kha Siangthou min in.

Mipi : Amen

iv. Pastor : Eite panpihna tuh Toupa min ah aom hi.

Mipi : Amah tuh van leh leitung bawlpa ahi.

v. Pastor : Aw, hongpai un Lalpen Pathiani phat dinguh.

Mipi : Amah I Hondampa ahi.

Hiai atung ate avek higige lou in khat lenghithei a, nih hiam thum hiam lenghithei hi.

4. Pathian beding a sapna : Bible simdingte – Sam 18: 1-3; 24: 1-5; 25: 1-5; 27: 1-4; 30: 10-12; 32: 10-11; 34: 8 – 10; 42: 11; 62: 1-2; 84: 1-4; 89: 1-2; 92 : 1-2; 95: 1-3; 96: 1-4; 98: 1-2; 103: 1-5; 111: 1-2; 107 : 1-2; 113: 1-3; 117; 138: 1-2; 145: 17-21; 146: 1-10; 149: 1-2; 150: 1-6 leh dangdang.

Isai 12: 5-6; 40: 28-31; 42: 5-6, 10; 44: 22-23; 55: 6-7; 61: 10-11; Jeremia 33: 2-3; Daniel 2: 20-22; Romete 12: 1-3. Hiai Bible tangte sim khiakma deuh hun

saulou mimal kilatkhia, aginglou a thumna nei in Pathian beding a sapna atunga Laisiangthou te pasan in Biakna pitu in sapna a bawl ding.

5. Thumna masa pen : Biakna pitu neih ding – Pathian phatna leh pahtawina thumna toh Pathian kiana thupina piakna a biakna latkhia ahi ding. Hiai pen mipi aging a thumna leng ahi thei ding.

6. Pathian phatna leh pahtawina lasak khawmna : Hiai hun a lakisa dingte biakna lam deuh leh thugen ding toh kituak hidiak leh a deihuai hi. Laa khat hiam nihhiam sak ahun mai ding. Kingakkhawmna laa ahilouh a Pathian phatkhawmna ahilouh ahi. Lasakna ichih chiangin athu a genkhia ahi. Huaizak in dinsa asak thil hoih ahi. Lapitu hoihtak aom ding duhtusam ahi.

7. Khelh pipuanna leh ngaihdam ngetna thumna : Lasak zoh in mipi khelh kipuanna, ngaihdam ngetna leh ngaihdamna hehpihna Pathian akipan muh ding lametna kimuangamna ziaka kipahtu genna. Khelh kipuanna ding in form kibawlsa hiam Laisiangthou pansan a mipin genkhawma

kipuanna leng ahithe a, mimalmal in kipuanna leh ngaihdam ngetna leng ahi thei.

8. Pathian apan ngaihdamna thupuan : Hiai pen Biakna pitu in Laisiangthou a ngaihdamna thute sim in ngaihdamna apuang ding (Sam 103; Isai 1: 18; 53; I Johan 1 : 8-9 leh adang dang). Hiai ngaihdamna thupuan zoh in ngaihdam a Iom ziaka kipahtu laa khat sak a hoih mahamah nawn.

9. Thuginpi genkhawmna : Hiaihun ah Apostle' Thugin genkhawm zelzel ding ahi. Biakna hunteng a ahilouh tawpin khakhat a khatvei bek, amun lua a om kei ding.

10. Ngetsakna thumna : Saptuam mipi ading a Pastor thumna hun ahi ding.

11. Thukhunlui Laibute simna : Thugen ding thupi toh kituak khat Thukhun Lui a Bible tangte bangzah hiam simkhia ding ahi. Hilhchet a ngai tua kei ding.

12. Thugenna: Thugen tuh biaknate laka apoimoh mahamhte laka khat ahi. Pastor/Thugentu in thugenna zangin mite Khrist itding leh Khrist lama piiding veina toh hiai anuaiate aseppiching sawmding hi:

i. Pathian thu leh khalam ann in inkuan masate avak ding a, hehpihna leh itna a khang dingin.

ii. Saptuam memberte midangte member thak pawlut dingin ahasuan ding.

iii. A thugen mikhual hong kikhawmte'n alunggulh zui ding khop un ahoih in, ahing ding.

Hiai atunga kigente ahih theihna dingin thugenna in hiai anuaiate atu'n ding:

i. Thugen tuh Bible pansana thugen ahi ding: Khenkhatte topical sermon, khenkhatte expository sermon, huan akhenkhatte textual sermon ahi ding hi.

ii. Thugen tuh hehpihna ziaka ginna tungtawn a hotdamna leh huai zuia hindan siangthou leh Pathian kianga thupina pia hinkhua atel gige ding.

iii. Toupa Jesu Khrist mihinna leh Amah nasepsa tuh thugen thupi lakhiakna bul in apang ding hi. Hiai pen mission saptuam phuhkhiak tung lain a poimoh na alian sem hi.

iv. Thugente himhim in saptuam mite taksap bang ahi chih a khoihkha gige dinga, huai banah, thugen tuh ahun toh kituak thupite ahih deuh akiphamoh ding hi.

v. Pathian thugen himhim a gentuin deihna leh theihchetna toh Pathian' thu thuneihna pansan in a gen ding.

|vi. Sermon tuh Pathian akipan ahihding, puakgikte, veinata ban ah phattuam ngaihna leh kithalawpna toh gen ding ahi. Gen ding theilou bangsim a om nepnup ding hilou ahi.

Thugentu in athugenna a tup leh ngim nei a agen ding ahi. Hiai tup leh ngim ding te:

i. Mite Pathian lam ngiahtuah ding a pii thei dia gen ding.

ii. Tanchin hoih tulai miten ngaihsutna asan thiehna dingdan ua gen ding ahi.

iii. Mite hinkhua leh tanchin hoih kituah dan latsak ding.

iv. Mite tanchin hoih gingta dinga kut ding.

v. Mikhial te adinga Pathian toh kilemna leh biakna lamet huai tak a latsak ding.

vi. Thugentu in athugen Jesu khebul atat ngeingei ding ahi.

13. Thilpiak a Pathian biakna (Doxology “vualzawlna teng naak” chih sak zohin alatna in azui ding):

Hiai pen thugen zoh ahoihna a om, Pathian thugen izakna tungtawn a thilpiak kiphaltak a piak theihna hon tun thei leh Pathian apan itan thugen tungtawn a izakte ziaka kipahna thilpiak ahih man in. Thilpiak te simzoh manlough ding lauh ziak

hiam a biakna item bullam a koih zawk ding chih thil kilawm leh zangkhai himahleh thugen zoh mah a lakkhawm in gen anei zaw hi.

14. Lasakkhawmna : Thugen toh kituak lakhat, phatnala nanung ding a sak ding.

15. Hunkhakna thumna : Thumna leh vualzawlina (Benediction). Vualzawlina ahiehleh Bible akigensate zat ding ahia, ahun leh amun zil a thumal kilawm behlap leng ahoih thou. Bible a vualzawlina te: Apostol vualzawlina kichite – Namberte 6: 24-26; II Thes. 3: 18; Rom. 16: 25-27; I Tim. 1: 17; I Kor. 13 : 14; Phil. 25; Gal. 6: 18; II Pet. 3: 18; Ephes. 3: 20-21; 6: 23-24; Judah 1: 24; Phil. 4: 20,23; I Thes. 5: 23, 28; Kil. 22: 20-21.

16. Doxology : Ka kikhopna uh tawp chiang' in leng' chih mipin sakkhawm ding.

Biakna a agige ahieh theih kei leh leng aloutheilou a tel teitei ding om nawn tuh Sacraments : Baptisma leh Toupa Ankuang Sianghtou ahi. Huan Lapawl, solo leh special number/ special music leh testimony ban ah reportna (Missionaryte apan) chihthe leng atel zel thil hoih ahi.

Simtute tengteng Pathian pomtak biakna pia a, kha leh thutaka biakna neithe zel dingin hon ompih chiat hen.

KIPAHTHU GENNA

Lhanghoi PYF in Keyboard project sepsuahna ding a sum leh pai a panpihtu, leh sum leh pai zangsak Elder M. Vungzapau banah, tha leh zung tampi seng a keyboard leina a panpihtu Pastor H. Thiankhanmuan leh David Samte tung ah kipahtu gen uhi. Sum leh pai thohte ahiehleh,-

- | | |
|-------------------------------|------------------------|
| 01. Dcn. Khekhen (1000) | 02. Pa Khaipi (2000) |
| 03. Dcn Lelet (1000) | 04. LK Lalboi (1000) |
| 05. Eldet Letpao Guite (1000) | 06. Pa N. Soson (3500) |
| 07. Elder Haumin (1000) | |

Kha Siangthou & MISSION

- Ginlun Valte

“Abangabang hileh, Kha Siangthou na tung ua a hongtun chiangin thilhihtheihna na nei ding uh; huchiin, Jerusalem khua khawngah, Judia leh Samari gam khua tengah, kawlmong phain leng ka thu theihpihte na hi ding uh, a chi a”

Nasepte. 1:8)

Kumsim in Pentecost Ni Saptuamte’n i zang zel uh a, ahihnatak mankha lou in ngeina dan in zat khak nak in a om a, a ni I zat ah i lungkim kha zel uh hi. Tukum in **Pentecost Ni** I zatna dingah et dan tuam deuh in, I dinna mun khek in *“Kha Siangthou leh Missions”* chih thulu pansan in houlim le ut huai kasa hi.

Pentecost pen mikang pau hi a, Greek laimal *pentekostos* apan kila, sawmnga(fifty) chihna ahi. **“Pentecost”** thumal pen ah bangmah nasep theihna hiam thahatna (power and authority) om a hi kei hi. “Pentecost Ni” pen Paikaan Ankuang lui tawpni (*The 50th day after the Sabbath of Passover week. Lev.23:15-16*) chih bel Nipi kal a ni masapen tulai a ding in Pathian Ni (Sunday) chia I zat pen uh genna ahi. “Pentecost” pen Nipikal Annkuanglui (*Feast of*

Weeks Deu.16:9-10), Pawltak Annkuangluina (*the Feast of Harvest Exo.23:16*) leh Buhthak tung Annkuangluina (*the day of firstfruits Nam. 28:26*) chihna khawng zong ahi hi. Tua ahihman in tulai a Sunday i zat pen Sunday ahih man a i zat hilou in i Toupa Jesu Khris gualzou/vualzoutaka sihna han a pan a thohkikna ni pen Pathian biak khopna ding a a izat a hizaw hi. Nidangte a biak theihlough chihna bel hituan samlou ahi.

Pentecost in a tup leh a ngim: Jesu thugen tangtun sakna (Nasepte 1:8). Kha Siangthou piak a chiam pen Pentecost Ni in Kha siangthou hong bawkhia lou hileh Jesu pen zuau gen a suak ding a, a thugente bangmah lou a suak ding hi. Nungzuite Tangthupha puangzak / gen kawikawi dinga thopna. Kha Siangthou hong tun chiang in thilhih theihna (power) na nei ding uh a chih pen Kha Siangthou a chiam hong pe lou hileh bangmah phatuamlou ding a, bangmah suaklou ding a, nungzuite leh eite'n Tangthupha genna ding in nasep theihna leh thahatna nei lou ding hi. Lei mong /Kawlmong dong a Tangthupha gen ding, Jerusalem, Judea, Samaria sung kia hilou in lei mong, Kawlmong dong a Tangthupha gen ding pen I Mission uh ahih ding ahi.

Pentecost Ni hong tun a Kha Siangthou buakna gahte: Pentecost Ni a Kha Siangthou a hong tun in na lamdang tampi a tung hi. Tuata lakah – Kha Siangthou-a dimna, Paudang a pauna, Hansanna, mi 3000 val pianthakna te a ni mahmah a muh theih-a gah a hi a, a nung in thil lamdang (miracles), suangkulh(jail) tanna,

bawlsiatna/ sawina / gawtna (persecution), leh Saptuam (Nungzui) kibe lapna in a zui tou zel hi. Pentecost Ni-a Kha Siangthou buak a om na gahte a tom in gen ni chi leng Missions (Jesu Khri a thei nailoute kianga Jesu Khri thugenna tua tungtawn a Jesu Khri Saptuam bawl) hiam Saptuam muhtheih a a khanna chi leng i gen khial kei ding hi. Saptuam i chih chiang gindan leh paidaan kibang kipawl na (denomination) hiam pawl kibawl kizom khawm (organization) hiam genna ahikei a Jesu Khri a om mite genna a hi. Pentecost Ni-a Kha Siangthou a hong tun a mikhempueh in Kha a tang ua, Kha Siangthou-a a dim ua kipan in Matthai 28:19 leh Nasepte 1:8 a I Toupa Jesu thugente a tak in hong tung pan ta hi.

Tu-tung in Kha Siangthou tunna gahte i gen khin zou kei ding a, I thupi-a i taklat pen ***Kha Siangthou leh Mission*** gen pah leng i chi hi. Atunga i gen sa mah bang in Pentecost Ni-a Kha Siangthou piak in a tup pen Toupa Jesu in a sep khitlouh - gamtenga kuana kawlmong dong a mite kianga Tangthupha gen a michih-

namchihte hawituam leh mangngilh neilou a Tangthupthupi i puangzak ding adeih ana hi hi. Tua tangtun sak ahieh theihna ding in nungzuite leh Khristian masate'n Kha Siangthou nasep theihna leh thopna poimoh uh a hi chih Toupa Jesu in haih lou a hih man in Kha Siangthou piak a na chiam a, piak zong a pia takpi hi. Tua mah bang in tu ni a eite'n zong tua Kha Siangthou tellou / om lou in bangmah i hih thei kei hi. Kha Siangthou tel lou / om lou a hattak leh thupitak a kalsuan i bat laiin a hawm (empty) pi khat i hih ding a lauhuai hi. Pentecost Ni-a Kha Siangthou nasep theihna leh thopna tulai Khristian te'n nak pitak in kitasam in poimoh mahmah hi!

Tangthupha Gen ding a Hansanna:

Nasepte a i muh bang in Kha Saingthou a hong tun phet in a launa uh leh dawiloknate uh paihmang a hi a, Tangthupha hangsantaka gen ding in Peter in hansanna a nei pah hi. Judate laua inndan tungnung a kibu gige lai Kha Siangthou a hong tun ni in bel mipi tampite maiah khutvai zen in Jesu hihna diktak, Judate'n a huat ua a thah thu uh leh sihna a kipan gualzou/vualzou taka han pan a thawhkiikna thu

hangsan tak in hong gen ziahziah ta mai hi. Tua ni mahmah in mi 3,000 val in Jesu Khris gingin baptisna a tang uh hi (Nas 2:41). Kha Siangthou na tung uah a hong tun chiang in nasep theihna na nei ding uh a chih pen na dang a ding in hilou in Tangthupha genna ding a hansanna nasep theihna leh gah a suah dingzia a genna ahi chih a chian hi. Tua banga tangthupha gen dinga hansanna kitasam mahmah hi !

Bawlsiatna/ Gawtna (Persecution):

(a) Nungzuite leh Khristian masate'n Jerusalem khua-ah kithuahkhawmna a neih uh nuam a sa lua uh a, Judia, Samari leh kawlmong dong a Tangthupha Gen ding hiam A thu theihpihte hih ding chih pen mangngilh kha deuh uh a hi kha in teh Jerusalem ah sawina / bawlsiatna a hong tung pan ta hi. Tua sawina/bawlsiatna ziakin Khristiante a lou theilou in a hong kikhenzak ta uh a, lau leh kibu a om mai lou in a paina peuh uah Tangthupha hong gen ta ua, tua tungtawn in Jerusalem kia hilou in Judia leh Samaria gamah Tangthupha hong tangkou pan ta uh hi.

(b) Nasepte laibu i sim touh zel leh Tangthupha a genna peuh uah

haksatna, bawlsiatna leh sawina, suangkulh sung tanpha a tanna a tuak uhi. Tangthupha genna peuh ah bawlsiatna leh gawtnate'n a zui zel a, tuate a mawkna hilou in gingtu kibehlap zel uhi. Tuni in tulai Khristian eite'n Tangthupha Genna jiaka haksatna, sawina , vauna i tuak kha hia ? Tuate tuaklou a igen theihlai in ,lungmuang kisa a om maimai ihih khak ding lau huai i sa mahmah hi!

Tutung in Pentecost in a tup leh ngim leh a sepkhiette a pan in tuni a ei a ding a a gennop (message) pen theih sawm in, a theih kia hilou in zat sawm in Pentecot Ni zang

ding in i kichial hi. Pentecost Ni-a Kha Siangthou a tun lai bang a i zat theihna ding in thungetna/thumna tampi tawh kisa khol in, hih *article* sim khempeuh in lamdangtak a Kha Siangthou ompihna leh vehna tawh sim a, kilamdanna nei a, **Pentecost Ni** a Kha Siangthou piak in a tup leh ngim pen tangthak a buching sak thei ding in Pathian hehpihna leh vehna i vek in tangchiat le hang chih ka thumna leh lunggulh a hi...

Hiai Articles gelhtu Mr.Ginlun Valte ahih leh, ReACH : Gospel Writing Ministry , Co-founder khat ahi.

DAIJANG SEMINAR

South Lamka Presbytery Women Fellowship (SLPWF) saina in Daijang ah numeite a dingin bikin seminar neih in om a, hiai hun ah South Lamka Presbytery in a huamsung a neimei tamtak tel in, ankuang umkhawm ngal uhi. Hiai seminar ah Rev. Goukhansiam, Superintendent, SLP banah Pastor G. Paukhansiam leh Pastor PL Thanga te'n seminar makaih in sinsakna pia uhi. Lohchingtak a hunte a zatna tung uah kipathu gen in, seminar a thu kigente tungtawn a khanlohna tam sem a om na dingin thum ni.

North East India Mite & TANGTHUPHA

- Elder Thuamson Hangzo

India Malsuah bial a Jesu Krist Tang thupha hong lutma in, agam mite khosakdan gamsa bangphial himok hi. Melma achihte uh lah a mi muhkak ngeilouhte peuhmah uh ahimai a, khelhna chih leng theilou in, Satan lungsim pawvek uhi. Myanmar a Pauchinhau in hiai laa na phuak hi: “Zinleng paalbang ka pomlaiin, gual in kamel hong ma e” achi banga miteng ki it omlou, kimelma et vek, kihaza tuah vek, ki hua hivek mai na hi uhi.

Mihingte lungput Dawi lungtang ahi mai a, midangte huatna, hazatna, mullitna, angsung theihnate haina leh thil diklou ahi, thil kilawmlou ahi, thil hoihlou ahi chihlam leng phawklou in khosa uhi.

Khasite bangin gul bia ua, midangdang te'n mithah chihkhawngte sualna ahihlan theilou in ngeina dan in nei uhi. Galman kichi te'n a thupi theipen in aihna (celebration) bawl ua, pahtawina ngah zawmah lai uhi. A galmatte ulah amimuh khak ngeilouhte uh hilel maimah hi.

Mawl law mahmah ua, midang, gamdang nam halhte khosak dan theilou in, mehkan dannangawn

thei kha lou ahi ua, huan Dawi le kau kihtakpetmah a kihta in lauhpetmah in lau uhi. Gawtna, sawina chihte a om zia theilou uhi. NEFA (tua Arunachalte) India sepaihte'n zawlbawl in annak pih in zudawn pih uhi. Zu honkham Chiang un Sepaih officerte thakhat in thatvek uhi. Athubuai uh Gauhati High Court a ngaihtuahna om a, a khente khailup ding, akhente damsung suangkhuhtang ding chiin Court in thukhenna bawl hi. Amaute mawllua leh hailua ahihman un, thukhenna apuanni bang un nui verver lel mai uhi. Amau vok igoh ding te'n bangmah a theihlough bang un bangchituk a khauh gawtna (punishment) leng theilou ua, kipak zawmah ua,

amithah ziaak uh ahihlang leng theikhollou mawk uhi.

Mundangdang Manipur, Mizoram, Nagaland te'n leng chiindan, tawndan, mulkimhuai leh haihuai pipi nei chiat uhi. Kaalteng nite bang leng theikhawllou ua, Pathiani, kiginni chih leng om tuanlou hi. Achinat chiang un dawite mahngoh in, lungkimsak na ding zong in gan a kithoih in, siampu (priest) in goh ding achih bangbang, neih leh neihlauh chih omlou in agou ua akithoih jel uhi. Japan gal (2nd World War) nung bang in tuantual lai mahmah uh ahihmanin, khatvei Haokip papi khat in dialvom tengin Tualphei taang a kipan allu (potato) saïip in honpua a, Lamka Bajaara zuakin kuva aleia, a haai leh kham in zun le ek suak in kho-ul kai niaunuau in alum maimah a, sunnung ninem in halhkhepan a, huchia paitou nawn in, inn a tun in Sial (mithun) in a kithoih hi.

Europe gam leh tumlam gam, hotdamna Tanchin Hoih mumasate'n, tutmuang pih mai lou in, gamteng ah a gen dingin kithedalh uhi. Huchiin, Manipur khopi Imphal ah kum 1893 in

Arthington aborigine' Missionary William Pettigrew hongtung hi. Huai kum mah 1893 in Aizawl, Mizoram khopi ah leng Missionaryte tung uhi.

Manipur ah, Manipur Maharaja in Meiteite lak a School hon ding bel a phal a, hihlehleng Pathian thu gen ding a phalhetkei hi. Huaiziakin a tuppen gen theilou ding ahihchiang in, a gen theihna ding chiin William Pettigrew Ukhrul a singtang mite lak ah a kisuanta hi. Amah sawltute'n, Meiteite kianga Tangthupha gen dia kon sawlna ua, omlou nahi chiin, aloh (salary) subei uhi. Huaiphet in Jorhat, Assam a American Baptist te kianga vahohin amau Missionary a zangding in ava kingen hi. Amau te'n lem anasa ua Ukhrul mah ah omsak pah uhi. Huaiziak ahi Kangpokpi area leh unau Nagate, Thadou-Kukite Baptist a atamna uh.

Huan India Malsuah gam Assam, Maghalaya, Nagaland, Mizoram leh Manipur a Jesu Krist Tangthupha honglut dan leh hongluthun akibang vekkei hi. Gospel hong lutma in a mite khosak dan gamnuaimi (tribal)

hinkhua, gammang lak a gamsate toh kigamla hettlou, mawl petmah a mawl, Pathianni (Sunday) leh a dangte chih omlou a, phalvak a gamkuan, khomui a vaitung, kha 3 valbang lou a giak den sek uh, khovak ma a loukuan khia, atate uh mel le puam nangawn leng theichianlou phial dan uh ahi. Avek in isui theikei dia, etsakna ataktak khat taklang leh anglimlang in a zattheih ding. NEFA (tulai a Arunachal Pradesh kichi) bang, World War II (Japan gal leng kichi) hunlai leh anung a, India in Independent (zalenna) a ngahnung nangawn in leng insung a taptung ah ui leh vok khawngte toh a

giakkhawm mai uhi. India Prime Minister masapen Jawaharal Nehru in Protected Area chiin Kristian Missionaryte hiai area ah lutsak hit hetlou hi. Kristian pauin genlehang khomial nuai a koih ahimai hi. Anthopologist Dr. Verrier Elwin chihlough kuamah lut ding phallou uhi.

Jesu Krist Gospel a lut masaknate Shillong, Tura, Aizawl, Kohima khawngte mundang sangin khovel thil ah leng halh masa uhi. Eilak leng Pathian thu honglut ziakin tuni chiangin gamdang nampilte mah i bangtheita uhi. Pathian lungkimna leh adeihdan zongchiatni Vangam tun ut chiat ihi ngal ua.

REV. G. PAU MUANTHANG KOREA AH

Rev. G. Pau Muanthang, Principal, RBI in Dortorate Degree a sinna toh kisai a zohna bawl dingin Korea zuan a, May kha sung in hong kik nawn ding hi. A khualzinna a lam tuamtuam a lohchinna a ngahna ding leh damtak a ahong kik nawn na dingin Pathian kiang ah thumna in phawk chiatni.

PCI(R)

Dinkhiakna & Dinkhiakdan

- Elder T. Thangzakhup, Mualkoi Presbyterian Church

Mi khenkhatte a din chimtak huaipi leng ahimaithei na a, Pathian in Agam nna iseppih ding Saptuam hon behlaptou zel a, hon vualzawl zelzel ahihmanin iSaptuam tanchin abul abal a theilou leng atamzaw tham bang kihita di ahihmanin, a kal laklak a taklat zel bangleng poimoh sakna kaneih ziakin tamlou hon taklang leng ka ut hi.

Huai kia leng ahikei a, i Saptuam' Calender uh bang i et chiangin Presbyterian Church in India, Reform (PCI, R) dinkhiakni bang leng ni nih (2days) bang iphasak sek ua, (PCI day & PCI Saunday) ani diktak theiloute leh ahong lut thak khenkhat te'n buaipih mamah uhi. Akoizopen ahia chipawl leng tampi om uh ahihmanin a ni diktak pen mah Chiangtak in taklang theizel leng hoih mahmah ding hi, hoihtaka ani zang or lawm nuamte a dia buaihuai omlouhna ding in. Alawm nuam or a zang nuam iom a izat theih liai leh ani taktak mah zang thei leng bel hoih mahmah ding hi. Aziakbel ei Saptuam' NI (day) ahi a, Saptuam dang te'n zaw hon phawk phak pih louding ahihman un ei aneitu te'n ipoimoh ngaih di ua hoih mahmah ahi hi.

Huan amin bang leng mun khenkhat khat ah Presbyterian Church of India chih banga gelhkhakna om zawmah lai hi. Presbyterian Church of India ahihleh Tuitha phai Presbyterian te ahi ua, amau toh kitheihkhenna dia ei a pen Presbyterian Church in India (Reformed) chia amin kiphuak ahihman in eite Presbyterian Church of India hilou in, in India hizaw ihi uh. Eh! Ani diktak leh amin hoihtak a itheihchet ua ihikhelth nawnlouhdi uh ka deihluat man in sau kahon gen lokha, igen utpen bang genkhalou dek zosen.

Igennop pentak ahihleh i saptuam kipatna dan leh aziak ban ah mi khenkhatte buai simsimnate theih dandan a hon gelh sawm kahi hi. Himahleh laibu lui or file kawm a

dohkhiak etton a gelh hilou in, lungtang sunga kep a om bangbang gelhkhiak ahi a, akum bangleng hong tamsimta kum 30 val bang hong hita ahihmanin theihkkelh, theihkhaklough bang leng omthei ahihna ah adiklou kha leh gelhkkelh khak a om leh leng hon ngaisiam a adik honhilh dingin ka honngen masa hi.

Pawl khat peuhpeuh dinkhiak (phuhkhiak) ahihchiang in amakai (ama phu) heutu aom masak poimoh ahihna ah, ei Presbyterian Church in India (Reformed) Saptuam leng aphut khetu Pu. Rev. Vung D. Tombing ahi. Amah tanchin leh ahon phuhkhiak dan gen nuam ihihman in a tanchin dang tampi genlou in Saptuam toh kisai in tamlou gen leng chi ihi.

Heutupa Rev. Vung D. Tombing 1974 kum in USA ah Laisiangthou sin in kuana M. Div. vazou hi. Aman M.Th azohma 1977 kum in heutu pawlkhat in Lamka College phuhkhiak sawm in pan anala ua, Lamka College anapan ua, tua ah Principal hidinga asapziak un amah ngei leng laisiam leh lailam lunglut mi ahihziakin hongpai a Lamka College Principal masa pen in

hongpang hi. Huchi in amah pen michitak leh fel hun tawk ahihban ah Saptuam lam ah leng kizang tou zel in ECC (tua EBCC kichita) ah pan mun poimohtaktak ana lentou den in amah hatnaziak in Convention Press leh Grace Bible College te ana patkhiakpih hi. Phetlou in School lam ah leng Board Chairman khawng in ana pang hi.

Heutupa Rev. Vung D. Tombing in Bible azilna apan Presbyterian thugin Bible toh kituak ahihdan hon musuah ahihman in School managing Board Chairman ahihlai in hiai thugin puanzakna lah hipah ding chiin School subject a tawiding laibute bang hon gelh in atomzaw thu kidawng, asauzaw thu kidawng chih te hon bawl hi. Huchia Presbyterian thuginpite ahon gen touhtouh chiangin ECC a heutu dangte toh hong kituaknawn kei ua, himahleh aman athu in honpompah unla'n ken ka gennawnkei dia huchiin i semkhawm ding uh chi hi. Himahleh tua tan leng pompah theilou uhi. Huchiin hunte hongpai zel in 1983 ECC kumtawp Khawmpi ah General Secretary Rev. T. Jamkothang in

Presbyterian gindan (Calvin gindan) pomtheih ahikei chiin report pia in puang khia hi. Huan nou Presbyterian Saptuam ka phutkhe ding ua ka omtuam ding uh nachi uham, nou thu (deihelna) a kinga ahi chiin thutawp pia hi. Huan Presbyterian thugin pomtheih ahi kei chih thu January 12, 1984 in ECC General Secretary Rev. H. Jankhothang in Local chih ah hawm zak ta hi.

Hun hongpai zel in ECC Saptuam in heutuapa, ui-ek khu mah bangkhopa bawl in thutawp pia uh ahihtakman in aman leng Presbyterian Church in India (Reformed) phuhkhiak sawm in pan honla taktak ta a Committee khat dinkhia hi. Hiai ah thukal zeh bang deusimin theih dia hoilh khat om: *North Lamka presbytery PYP ten PCI (R) founderte lem Head Office ah hontak khia ua kipah huai lua, Head Office ah founderte lem kitakhe haklua hizomah hi. Himahleh PCI (R) phuhkhiak lai a inn 17 pen inn 18 hon phasak uhi. Aziak ahihleh unaupa B. Kamkhanthang ahontelsak ziak uh ahi hi. Amah unaupa B. Kamkhanthang pen den a igen*

mah bangin, heutu pa'n Committee khat ana phuhlai in Secretary khat in naguang hi. Amah heutupa B. Khamkhanthang ngei in leng 1978 kum in Presbyterian te chawm in Kanpur a B. Th. ana zou ahihmanin Reform gindan ana pompih mahmah hi. Huchia lunglut tak leh Saptuam dinkhiakkal ngaklahtaka om himahleh Committee pen lah Function lou phetlou in amah ngaklah banga saptuam ding khe theipahlou ahihmanin ngakzou nawnlou in ana nuakmanta hi. Huaiziakin saptuam dinkhiakma leh Saptuam dinkhiak nungin leng hong kilang khanawn kei hi. Amah ahihleh 2004 kum in EBCC khawmpi ah Rev. L. Khamkholun in Upa hiding in Ordain hi. Huchiin gin om leh kuhkaltakin a omna Phailian Saptuam (Zoan church) ah, asihni September 9, 2015 tan ana om denta hi.

Hunte hongpai zelin Saptuam phuhkhiak ding ani akha leh ahun hong tungpetmahta a April 20, 1984 (*Good Friday*) nitaak in Upa Tualzachin' Inn, Mualkoi khua

ah Presbyterian Church in India (Reformed) Saptuam thak liklek vuah delhlouh, heutupa Rev. Vung D. Tombing makaih in inkuan sawm-le-sagih in abul anapan khia in ana phutkhia uhi. Amaute:

1. Rev. Vung D. Tombing.
2. T. Tualthang.
3. Elder T. Tualzachin.
4. Elder T. Thuangkhopau.
5. Elder T. Sinkhokam.
6. Deacon V. Tuangkam.
7. T. Thangvum.
8. T. Tualkhothang.
9. T. Ginhang.
10. N. Zamsiam.
11. Mrs. Lianvung.
12. Elder T. Thangzakhup.
13. Vungpum.
14. Elder Dr. LK Tombing.
15. Phungpau.
16. V. Kamkhanthang.
17. Thawngkhopau

Hiai ni (20, 4, 1984) nitak mah in session kitelna leng kinei ngal a, Result anuai a bang ahi:

1. Moderator : Elder T. Thuangkhopau
2. Vice Moderator-cum-Treasurer : Elder T. Tualzachin
3. Secretary: Dr. LK tombing
4. Asst/Secy-cum-Finance : Elder T. Sinkhokam

Huchi in meeting kinei zuingal in Dt. 29, 4, 1984 (Pathianni nawn) tan a omna lui saptuam chiat a kitawpna lai piakchiat ding chiin kithupuk hi. Tua dungzui in mi 15 te'n kitawpna lai kipia a, himahleh

lemtan louhna khenkhat ziakin unaute mi nih Dr. LK Tombing leh V Khamkhanthang te'n kitawpna lai a piak louh ziakun Inn 15 kipha a, member a si asen a sim in, apiang dektakte simtellou deuh in mi 90 geih kipha hi. Huchi in Dr. LK Tombing pen secretary dia guan himahleh lemtanlouhna hong om ziakin Elder T. Sinkhokam Secretary cum Finance din kikoih hi. Ahi a Dr. LK Tombing pen i saptuam PCI (R) a alunglut na beitheilou ahihman in sangkhat zakua somkua leh bangzah hiam kum in PCI (R) a honglut taktak ta in Elder ordain a om in tuni tan in muanhuai leh gin omtakin omden hi.

Genbeh zek laileng Pathian in saptuam ahon pat khiaksakte thawm hau, pangpa lua aom ding hon phallou ahiding a, ECC Pastor Rualzakham zot a aom dungzui in a hon pomsak a June 1984 in Pastor dingin kila lut a, organizing Pastor min piakin om hi. Hiai kum mah 1984 in saptuam kho 5 in hon zom uhi. Tuate: 1. Vungbuk East. 2. Tallian. 3. Kaihlam. 4. Mualnuam. 5. Pangliante ahi uh.

Hiai kum mah in saptuam a department khenkhat leng phuhkhiak in om hi. Tuate:

1. Mission Board September 9, 1984
2. PWS (tulaia PWF kichita) September 16, 1984
3. PYF October 25, 1984
4. PYF Central Board dinkhiak ni: February 23, 1987 Vungbuk ah.
5. PWF Central Board dinkhiak ni: February 5, 1997 Rayburn Biakin ah.

Huan 1984 kum a General Assembly kineilou ahihmanin 1985 January 8-10 in General Assembly Mualkoi biakin ah kinei a, tua hun ah Pastor 5, Elder 2, leh Deacon 5 te ordination piak ahi ua, officiating minister Pastor Raulzakhm ahi.

A. Pastorte:

1. Pastor Daizagin.
2. Pastor Thawngsiam.
3. Pastor Khamthawng.
4. Pastor TS. Thangta.
5. Pastor K. Vungkham.

B. Deaconte:

1. Deacon Khengin, Mualnuam.
2. Deacon Thianpi, Vungbuk
3. Deacon V. Tuangkam, Mualkoi.
4. Deacon Phungpau, Mualkoi.
5. Deacon T. Thangzakhup Mualkoi.

C. Elderte:

1. Elder Nengkham Panglian.
2. Elder Khaizachin Vungbuk.

PCI (R) Saptuam' min diktak Presbyterian Church in India (Reformed) ahi a, PCI (R) dinkhiakni April 20, 1984 (Good Friday nitak) ahi hi. Huan i Saptuam din khetute laka mi bangzahhiam te'n mahni deihtel theihna khovel a om ihildungzui in amau deihtelna leh lunglut zawkna dungzui in pawl dang ah honna kiheisan uhi. Presbyterian Church in India (Reformed) Saptuam Toupa'n vualzawl denta hen, Amen.

ASSAM MISSION FIELD

Assam Mission Field a semtute'n Cottage Fellowship (Naupangte tuition pe kawm a Pathian thu hilh panta uh. Thumna ah thei ni.



LA-TE' THU

Akaikhawmtu: Rev. H. Chin Thiansong

**“Ima ei angang oiringeida,
Isorgi wahei tambiradi
Ei ashum haina leiroy, Ima!”**

Nu-leh-Pa tampite lungkhoih leh khitui luangsak “*IMAEIANGANG OIRINGEIDA (NU AW NAUPANG NEU KA HIHLAI IN)*” Chih la aphuaktu Sia PauzaCin, December 27, 1954 in Tonglon (Tuijang) khua ah piang hi. Apa En Hang Hatzaw hi a, anu Cin Za Huai ahi. Sia H. Pau Za Cin in 1992 in zi nei a, tu'n tanu 2 leh tapa 1 nei in, Go Cin Khup Veng, New Lam ah tenglel hi. Aman kum 1964 in Sumchinvm LP School ah laisim pan a pawl 10 zou hi. Churachandpur Collge ah kum 1978 in B. A. zou in, 1993 in Manipur University ah M. A. zou in 1990 in B.T. zou hi.

Sia Pau Za Cin in kum 1975 in Hill Model School ah Teacher nna sem in a nunlam kum 1980 apan in Lingsiphai Govt Jr. High School ah Teacher sem a; Vimala Raina High School leh Lungchin Jr. High School a a sepnung 1993 apan DIET/CCPur ah Lecruter sem in, 1999 apan in DC/CCPur Office ah Coordinator, District Total Literacy Campaign/CCPur ah sem hi. Sia Pau Za Cin bel tulel a Saptuam leh khawtang a pawlpite phutkhetu ahibban ah laigelhsiam leh makai khat ahi. India gamsung

leh mundang ah leng training tamtak zouta hi.

Aman English, Manupuri leh ei pau a la a phuah kigawm 30 lakvelte lak ah Hill Model School a a seplai in drama a chiin ding thugelh (dialogue) a gelh tawh kituak in “Ima ei angang oiringeida” chih Meitei pau in phuak hi. Tuni tanpha in amah thugelh pen Magazine tuamtuam ah kisuah in hiai “Ima ei angang oiringeida-*Nu aw naupang neu ka hihlai in*” chih ngial houh pau tampi in kiletta hi.

Hiai la in naupangte neuchik ahih uapan lampi dik a pi apoimawhdan leh amanphatdan hon sinsak a, nu le pate hon kiguihsak hi.

*“Ka hinna bei ding hita,
bangchidan hiam aw;
Ka kha tawlnga ding hita,
ngaingam kei veng aw.
Nu aw naupang neu ka hihlai in,
Tangtawn hinna thu honhilh lechin;
Kei tuabang in om kei ning Nu
aw....*

Sia Pau Za Cin in English a la aphuahte lak ah “He’s Coming Back” chih leh “It’s No Wonder I’m a Teacher” chih minthang in kisa tam mahmah a; ei pau a aphuahte lak ah leng “Ei tuibang kigawm leng kuan gibang honkhen ding...” “Siamsin momno” leh ‘Hanlung chiam ni’ chihte Audio cassette tuamtuum ah mituamtuum te’n khumin anasa ua, tutanin mite hoihsak leh ngaihrop pen hiden lai hi.

MATERIAL AND CHILD HEALTH (MCH)

(Tunnu leh Nausen chidamna)

Nu leh naungek damtheihna ding in a huapte:

- i) Promotive care (khang hoih sak sem ding/hoih sem ding)
- ii) Preventive care (a nat ma a kikepsiang/kiven ding)
- iii) Curative (a natna apan kep dam ding)
- iv) Rehabilitative (natna ziak a kisesate kep hoih leh tungding thak ding)

MCH tup leh ngimte:

- i) Nupi gailai/naupai, nu naunawi plate leh naungekte sihna leh natna tuntheite kiamsak ding.
- ii) Taksa leh lungsim damna uangbawl sem ding.
- iii) Nau neihna lam khan hoih sak sem ding.

ANTENATAL CARE: Nau neih ma a kikepna) Antenatal care kichi tuh numei naupai lai kepna genna ahi. Nu in nau apai tung akipan a pai sung teng huapvek hi.

Tup leh ngim:

- i) Nupi gailai-te damtheihna khansak leh hoihsak sem ding.
- ii) Nu a ding a lauhuai thei natnate mukhiak a kepdam pah ding
- iii) A nau neih haksat didan ngaihtuahna beisak ding.
- iv) Naungek leh anu natna leh sihna apan hutkhiak ding.
- v) Nu in anau kep dingdan hilh ding, bang nek ahoih ding? Mahni kikep siangthou dingdan sinsak ding.

ANTENATAL CHECK-UP

- i) Kha khat a khatvei naupai kal 28 aphak tan (once a month until 28 weeks)
- ii) Kha khat a nihvei naupai kal 36 aphak tan (twice a month until 36 weeks)
- iii) A kaltawpna kal li sung kalteng a check-up a hoh ding (weekly visit during the last 4 weeks)

HEALTHY DIET DURING PREGNANCY

Ann hoih, siangthou leh poimoh nu naupai in anek ding:

- i) **Calories:** Naupai nu in kha masa kha 3 sung in 2000 clories poimoh hi. Aban kha li apan kha guk sung 22000 calories anek ngai hi. A kha tawpna lam, kha sagih apan 2400 calories nitengin poimoh hi. Naupai lai a dieting bawl louh ding ahi.
- ii) **Carbohydrates** in taksa hatsak a, khuak nasepna ding leh taksa hiang tuamtuamte hatsak hi.

Sources: Carbohydrates nek apan muhtheihna leh nek tam dingte:

- i) Be (Beans) ii) Badam
- iii) Anteh louhing
- iv) Tehigah (nahtang)
- v) Pasta vi) Vaimim
- vii) Allu

Nek tam luat louh dingte:

- i) Bread ngou ii) Cookies
- iii) Chips iv) Sugar
- v) Sweeteners

Protien: Protein in nek leh dawn apan hatna hon pia a, natna doutu hatsak hi. Sam, mit, vun, taksa leh sunglam a hiang tuamtuamte bawl na ding in poimoh hi. 75 grams apan 100 grmas niteng a nek ding. Na naupai lai damlouh theih na ding aom a, ahihkeileh na

taksa in a poimoh luat leh na doctor in atung a gram kigen pen sang a tam zaw hon chi thei lai hi.

Muh theih na dingte (Sources)

- i) Bawngnawi
- ii) Bekan
- iii) Sa
- iv) Aktui
- v) Ngasa
- vi) Singgah leh theigah tang
- vii) Be
- viii) Havai tang leh Betang

FIBER

20 grams – 30 grams fiber niteng a nek gige ding, huai in ekkhal lua, dailen haksa leh tokhei (piles) apan hon veng ding hi. Nek a muhtheihna dingte:

- i) Anteh louhing
- ii) Haichi gap neite – begap leh adangdangte
- iii) Theigah
- iv) Whole grains
- v) Nahtang

FATS

Hatna ding leh taksa hoihna ding, khuak a ding leh sisan hatsaktu dingin thau hoih poimoh hi. Damtheihna dia hoihlou, an kikang (fried rice) leh packet a kithun thau hoih lou pannate nek tam louh ding ahi. Nek leh dawn louh bikbek

ding chihna ahikei, thau hoih na nek pen na naungek khuak (brain) a dingin hoih hi. Thau hoih pekhe-te

- i) Avocado
- ii) Nipipaktang
- iii) Maitang
- iv) Makhagah
- v) Vaianthuk tang
- vi) Olive thau
- vii) Fatty fish

SALT

Chi al ahun giap a nek ding

FLUIDS

Naupai lai a tui dawn tam ding. Ni khat a glass 10 tunglam dawn sawm teitei ding ahi. Tui dawn tam in zun tamsak a huai in zungui natna tuamtuamte apan hon veng a, sung a naungek a ding a lauhuai akipan hon veng thei hi.

Coffienated drinks dawn louh ding. Bangziak hiam i chihleh huai in lungphu hatsak a, tua in naungek thazam toh kisai hihbui thei hi. Coffienated drinks i chihte bel,- coffee, ice-cream, yogurt, non cola sodas, hot chocolate, fancy water.

CALCIUM

Naupai lai nu in 1000 miligrams calcium niteng in poimoh hi. Calcium in guh (bone), ha (teeth)

hatsak a, lungsim leh taksa khan hoihna dingin poimoh hi. Ki at khak (cu/injury) chiang a sisan luang akan theih na dingin calcium poimoh hi. Calcium in sisan khalsaktu panpih hi. Naungek apian chiangin 25grams calcium ataksa a omsa pen anu apan ahi. Huaiziakin nu naupai in clacium hoihtak a nek ding ahi.

Calcium materials:

- i) Bawgnawi
- ii) Anteh-louhing, kobi, broccoli
- iii) Bekan
- iv) Theigah tang
- v) Ngasa
- vi) Tofu
- vii) Cheese

FOLIC ACID

Folic Acid kichi vitamin chikhat, taksa in a poimoh mahmahte lak a khat ahi. Sisan leh DNA (Deoxyribo Neutic Acid) bawlina dingin poimoh hi. Vitamin hoih leh poimoh nu in a nek ding zah a nek louh chiangin naungek in nungzangguh khang diklou neisak thei hi. Nu naupai laiten 600 micrograms nitengin poimoh hi.

Sources:

- i) Anteh louhing
- ii) Aksin

- iii) Be (Kidney beans)
- iv) Betang (lentils)
- v) Avocado
- vi) Aipak (asparagus)

IRON

Iron kichi minerals chikhat taksa in a poimoh mahmah hi. Khuak khang hoih sak a, taksa tung lum leh vot control, sisan bawltu, taksa hatsak leh taksa tung ah huihsiang hawmzaktu ahi. Niteng in taksa in 18 miligram poimoh gige hi.

Source:

- i) Sa sin
- ii) Be
- iii) Maitang
- iv) Sa/Ngasa
- v) Bekan
- vi) Theigah (Grape keu)
- vii) Aktui
- viii) Broccoli
- ix) Brown rice, Spinach

KANGAROO MOTHER CARE

(kmc)Kangaroo kichi Australia gamsa chikhat ahi. Aman atai ah nau puakna sakhau nei hi. KMC tup ahihleh nu leh a naungek kichimat a koihgige ding, nau in nu nawi hoihtak a atep ding ahi.

KMC naungek a ding a aphattuamnote:

- i) Naungek nak dan (Breathing) hoihsak
- ii) A taksa ah huih hoih tam sak
- iii) Ihmut nuamsak
- iv) A chilum dan hoih sak
- v) Natna thuk hatsem uh.
- vi) A khuak lam uh bawlhoh, khangsak
- vii) Sisan a khumna (Blood sugar) hoih sak.

BREAST FEEDING

Breast feeding i chih chiangin nu in naungek nawitui a vak, nawi tepe sak chihna ahi.

- i) Naungek apiankhiat zoh chiang a nawitui om masapen (colostrum) a piak ngeingei ding ahi.
- ii) Nawi langkhat a minute 20 a piak ding, a zoh a langkhat 20 minutes mah a piak ding ahi.
- iii) Naungek a pichin deuh chiangin minute 5 apan minute 10 kikal tan apiak ding ahi.
- iv) Dakkal 24 sung in 8 vei apan 12 vei a piak ding.
- v) World Health Organisation (WHO) in asui dan in nu in a naungek kum 3 tan nawi apiak ding achi uhi.
- vi) American Academy of paediatrics ten hichin ana recommend uhi. "Nu in anau atopen pen a kum 1 nawi a

piak teitei ding, huai ban chu anau in hun asak tan apiak ding" ana chi uhi.

Nu Nawitui a phattuumnate:

- i) Nu nawitui ah naungek in a poimoh teng kim hi. Nu nawitui in naungek a ding a poimoh nutrients tuamtuum carbohydrates, protien, fats vitamins leh mineral pia hi.
- ii) Natna doutu hatsak : Nu nawitui masa (colostrum) in naungek natna hik douna suhat in natna hik apan veng hi. Bawngnawi bawltawm (formula fed) a vak naungek ten bil natna nei tam uhi. Naungek nu nawi tepte toh teh in.
- iii) Nu leh nau ki itna khangsak hi
- iv) Sung sia leh sungna tawm sak hi. Formula fed naungekte'n sungkhoh nei mun uhi.

Gelhtu :

Miss Nuamngaihlun
Agape Babies Home,
New Lamka

BRIEF SYNOPSIS OF DELHI PRESBYTERIAN CHURCH (2008-2018)

Ten Years of God's Providence and Guidance

April 2008 in Elder Chinthang in PTS, Dehradun a M.Div a zoh toh kiton in Head Office in Delhi khopi sunga PCI (R) saptuam sung mite laka Pastoral Ministry pan dingin mohpuakna pia hi. Huai ahihtoh kiton in, Pa Lulun Tombing inn ah May 2008 nipikal thumna in Cottage Fellowship pat ahi. Huai tuh Delhi Presbyterian Church hong piankhiat dan ahi. Elder Chinthang etkaina nuai ah saptuam dinsuah ahi; Aman, YMCA a sepna a ngah toh kiton in August 2008 akipan huailam ah full-time in sem hi.

Kum 2009 in MELC tuailai khenkhat in PCI (R) Cottage Fellowship ah hong kihel zelzel uhi. Huchiin, Biakinn a kikhopna 2009 a pat in om hi. A mi hong pungtouzel ahihman in, kemtu bei belum bang ahihman un Pastor khat etkaina nuai a om ding poimohna liantak a hong omta hi. Huan, May Nipini thumna ah Rev. Khen P. Tombing, Chief Coordinator, PCI (R) in NTBC Biakinn, Munirka a biakna masa uap in, saptuam min **“Delhi Presbyterian Church”** chih pia hi. Huai kum May Nipini thumna *“First Anniversary of the*

Delhi Presbyterian Church” chih a chiamteh ahi.

Kum 2010, January ni 3 ni in Rev. Khen P. Tombing in Biakna hun ah naupang thum baptisma pia hi. Amaute Delhi Presbyterian a dinga gah masate ahi uhi. Saptuam mite' thumna Pathian in dawngtou zel in, Head Office in Full-time Pastor masapen dingin Pastor T. Liankhohal sawl ua, Delhi Saptuam ah etkaina na sem dingin March 2010 in tung hi. Huan, amah kithuahpih ding Elder 1 leh Deacon 1 ngetna Head Office ah piak ahi.

Kum 2011 in Head Office phalna in Elder Chinthang leh Deacon T. Khaimuanthang ordained in om uhi. Hiai kum in leng Pathian in saptuam ah mi behlaptou zel hi. Kum 2012 in Deacon Pausuanhau, Mata Mualtam in behlap in upa 3 neita uhi. Hiai kumin saptuam in Pastor T. Liankholal makaihna in Church Outing Program masapen dingin Rural Community Development Centre, Hodal ah neih ahi.

Kum 2013 in saptuam milip leng hoih huntawakta chi in, Session in a nuai uah department tuamtuum bawlkhia uhi: PWF, PYF, PMF leh Deacon Board. Hiai department-te ah makai muanhuaitaktak in enkai ua, saptuam in mailam nawtsel hi. Tunitan in hiai Department-te hohtakin paizom hi. (*Upate deihna bangin Deacon Board ahihleh Session in pawkhawm hi.*)

Kum 2014 in Church Outing Program Deer Park ah nei in om nawn hi. Huan, upa kisapna aom ziakin Elder 1 leh Deacon 1 Head Office ah ngetbeh hi a, huai dungzui in Elder T. Khamkhanchin leh Deacon Mangkhanlal Gualnam ordination piak in om uhi. Huan,

Pathian' pina leh taksapte petu ahihna ziaka kipahthu genna in saptuam kum guk chinna leng lop ahi.

Kum 2015 saptuam General Transfer ahihtoh kiton in Pastor T. Liankholal leng transfer a om in, ama tangin Pastor K. Zam khansuan, Sinzawl PC akipan March 2015 in hong tung hi. Kum 2016 in Advance Christmas Program zatna thupitakin kinei hi. Huai ah Rev. Khen P. Tombing leh Htn. Rith Tombing in thugenna hun zang uhi. Huai hunin "saptuam' a" chihtheih ding, biakkhawmna mun, leh Pastor inn dinga kiching poimoh sa in Session in ngetna piak ahi. Hiai kum in General Assembly ah kitelna om a, Pastor K. Zamkhansuan leng Superintendent dinga telching in om hi.

Kum 2017 Pastor-te transfer hunin Local Pastor omlel pen dinmun sangzaw len dinga vawkkai a om ahihman in kisuan hi. Aman a nutsiat ma in #61, J-Block, Paryavaran Complex, Neb Sarai, New Delhi ah saptuam inn ding leikhiat pih hi. Huan, Pastor H. Thiankhanmuan & Family, DPC Pastor thumna dingin March 2017 a hong tung in, April 29, 2017 in, inn thak luah uhi. May

21, 2017 in Rev. G Paumuanthang, *Principal RBI* in Pastor Quarter dinga latna nei hi. May 2017 akipan in Head Office in Biakinn grant ana piaksekh uh lakkhiat ahihtoh kiton in Delhi Presbyterian Church mahni khe a ding in Munirka ah Biakna sutzop ahi. Neb Sarai Prayer Fellowship June 2017 a pat ahi. GA 2017 Agenda dingin “*Delhi Presbyterian Church leh Good News Presbytery, Lucknow gawmkhawm ding*” chih ki pawlut in, GA hun ah sepsuah dingin thupuk ahi.

Kum 2018 in GA 2017 thupukna dungzui Chief Coordinator in March 2018 in Delhi Presbyterian Church Local Pastor leh Rev. John Kushal hon kimutuahsak hi. Mailam hun a sepkhawm dingdan leh Head Office in sepkhawm dingdan *direction* hon piak uh bangbang ngak leh zui dinga mansa in ki om hi. Hiai hih lohchinna leh Missions nasepna dinga kong liantak banga ngaihtuah ahi. Nipini kikhom theiloute a dingin Munirka ah monthly Worship April 2018 in pat ahi.

Awle; Pathian pina thupitak ziakin, Delhi Presbyterian Church in May

20, 2018 in “**KUM 10**” mel muta ding hi. Thumna, tha-le-zung leh sum-le-pai a hiai saptuam tungdingtute tungah kipahtu ka hon gen uhi. Pathian’ kha opkhum saptuam hizelzel thei dingin thumna ah panpih chiat ni. Delhi khopi a nekzonna leh siamsinna ziaka omte kiangah, *ei saptuam mah vabel un* chih nu-lepate’n hon hilhsawn sak un.

2018 SESSION

Moderator :

Pastor H. Thiankhanmuan, Local Pastor

Secretary :

Elder Chinthang

Finance Secretary :

Elder T. Khamkhanchin

Treasurer :

Deacon Mangkhanlal Gualnam

Lay Members :

Lulun Tombing

H. Lianminthang

Ka kipak.

Sd/- Pastor H. Thiankhanmuan,
Moderator,
Delhi Presbyterian Church.

NUTE' NI PHAWKKIK THAK NI

-Nu Chiinhoihkim

Ei tel in khovel gam tampite'n kum 1914 apan tunitan in May kha a Pathian nni nihna tuh NUTE' NI in zang sek uhi. Hiai ni poimoh hong tun chiangin NUTE manphat dan leh NUTE NI hong piangkhiak dante tanchinbu tuamtuamte ah gelh leh gen in om sek hi. Ken leng hiai i messenger deihtoh tak tungtawn in kana gelh kha ngeita hi. Huaiziakin Nute' Ni hong kipat dan leh Nute manphat dan i theih mahmah tak uh ka gingta. Tutung in ahileh etdan chituam deuh in enle ut huai i sa hi.

NU hon petu Pathian phawkkik thakni (Gen. 2:22-22, 3:20)

Pathian in Eden huan a Adam leh Evi a siam nungsang mihing siam nawn lou hi. Pathian' lemgel zui in nupa kitenna tungtawn kia in khovel ah mihingte i piang uhi. Huaiziakin ngaihtuah vengveng lehang Nu leh Pa om kei leh khovel a pianglou ding ihi. Huan, nu leh pa om maw le-le Pathian lemgel hikei leh ki piang tuan lou ding hi. I bulpi zaw Pathian ana hi eive maw. Nu hon petu Pathian' kiang a kipahtu gen kawm in thupina i pia ahi.

Khovel ah nuamsa, genthei, zawng, hausa in i pianna Nu phawk lou zen in khovel zap mahlehang, khatvei tei, singnah pulh in a phung a den bangin, i bul leh i ki patna, Nu hon petu Pathian in i tungtang ngaihtuah thou thou ding ahi chih mangngilh kei ni. I pian akipan kemtu dia i Nu

hon piak kia le manpha lua ahi. Tangtawn hinna i neih theih na dia a Tapa Jesu Khrist hon piak beh lai tel!! Pathian' hon itna manpha in lian hinatel e. Ahon itna thei khanailou na hih zenzen leh, na Nu hon itna theihsiam haksa na sak hun om kha ding hi. Huaiziakin Nu itna na theihsiam theih na dingin na Nu hon petu Pathian' itna na theihsiam masak kiphamoh mahmah hi.

NU manpha

Tate adia Nu manphatna tuh, (a) Hon suangtu leh sinsaktu ahi (Gen 3:20, Diu 6:7). Huaiziakin Nu tuh pahtawina tang dia phu him ahi. Nu tuh khovel hinkhua adia sinsaktu (teacher) masapen ahi. Huai ahiah kawmkawm in suangtu leh sinsaktu in mohpuakna lianpi a nei ahi chih mangngilh kei ni. Nu in i tate thu i sinsak a? I omdan leh kampau tungtawn in bang sinkhiak a nei

ua? I sinsak louhpi i taten theisiam ding un lamem maww kei ni uh maww? Hotdamna lampi kawkmuh in sinsakni.

(b) Vualzawlina nak (Diu 5:16; Eph.6:1-3): NUTE' manphatna nawn mahmah tuh vualzawlina kemtu ahi uh. Fel in fel kei in, pil in hai taleh Pathian in na Nu khut ah vualzawlina koihi. Na Nu lungkimna bangin om in, a thu mang lechin salam leh khalam vualzawlina nang a hong hi ding hi. Huchibang a nute' khut a vualzawlina om ahilhai in Nute a ding a ngaihtuah huai mahmah tuh vualzawlina i kep pen i tate tung ah bangchi bangin i zangkha a? Heh leh lunggin a i om hun in i kampau kidawm mahmah ni. A khonung a i kisik louh na dingun. Paunak in "Tui bawsa kiluakkik theilou" a chih bangin i kam apan pawtkhia thute pen kila kik theilou maww hi. I tate hamsiatna leh vualzawlina thute pen Pathian in hong thukim pih lua ahimanin pilvang mahmah ni.

(c) Khamuantu (Isai 66:13, Pau

31:10-31): Tate leh a pasal a ding a Nu manphatna nawn tuh khamuantu ahihna ahi. Nu omna insung tuh a nuam in, a lungmuan huai in, abukim hi. Nu tuh a pasal leh tate a dingin khamuanna tuntu ahi. Lungkia leh lamet bei a aom hun ua khamuantu ahihziakin ZAHNA i pia ahi.

Awle, NUTE, na pasal leh na tate'n khamuantu dia hon lamet lai un, bangchi bangin na khamuan a? lungkhamna leh natna, hehna su pungtu mai na hi kha hia? Job zi in, a pasal haksat hun in "Na Pathian gensia inla sisuk in" a chih bangin kampau na zangkha ngei hia? Tuni in ngaihtuah thak ni, i tate leh i pasal in i kiang a om nuam sa in a khelah tuntun uhia? Khamuang leh tawldam huai a sa uhia? Tukum NUTE nni hong tun nawn toh kiton in i manphatna te i zat khelkhak ding uh pilvan huai kasa. I manphatna pen Pathian' thupina din zat sawm chiat ni chih i ki chialna ahi. Simtute Toupa'n hon vualzawl hen.

THUMPIH DING

Anuai a saptuamten maban ah hotdamna chialpi nei ding uh:

Bethel Presbyterian Church	: June 13 - 17, 2018 sung
Elim Presbyterian Church	: June 20 - 24, 2018 sung
Rayburn Presbyterian Church	: June 28 - July 1, 2018 sung
Olive Presbyterian Church	: July 4 - 8, 2018 sung
Khawdungsei Presbyteian Church	: June 8 - 10, 2018 sung
Sinzawl Presbyterian Church	:
Zehang Lamka Presbyterian Church	:

If undelivered, please return to:

The Editor
PCI Messenger
P.O. Box-32, Presbyterian Church in India (Reformed)
Head office : New Lanka (H) 795128
Manipur, INDIA

BOOK POST

To: _____

